

lis Gnovis

REANE. Lis cuviertis dal ricuart



Di une bande, la cjase di Tino a Vergnà di Reane, une sorte di cjase famee par personis che a son maladis di demence e di Alzheimer, e di chê altre une scuele, l'Isis Raimondo D'Aronco di Glemone, dulà che Tiziano Picogna, insegnant di Tecnologjie e di Industrializazion de Mode, al à proponût aes studentessis de classe cuarte un percors che lis à svinadis al mont des malatiis dai gnerfs doprant lis lôr tecnichis, cu la realizazion di cuviertis tatilis, di tocjâ, pensadis apont par stimolâ i sens e judâ cui che ben planc ju stan pierdint. Ta chest mût, lis mans des frutis che a àn cusidis lis cuviertis pai ospits de cjase, si cjataran insiemi a chês di chei che a scombatin cu la pierdite dai lôr ricuarts.

POCEC DI BERTIÛL. I citadins no vuelin i poleçuts

850 mil poleçuts a son in spiete di incjasâsi tal teritori di Pocec di Bertiûl, in graciis di un progjet industriâl che al previôt di meti in vore, in granç capanons, une produzion in cinc ciclis par an. Tançj citadins di Bertiûl, cundut che ancje a lôr i plasi il cicin di poleç, a son contraris a chest progjet, e lu àn fat savê cuntune assemblee e cuntune racuelte di firmis, cemût che par solit si fâs ta chescj câs. I citadins a considerin cheste opare insostignibile pal teritori. Dal pont di viste juridic, no si pues fâ di mancual di evidenziâ la dibisugne di un balançament rigorôs tra la iniziative economiche e il dirit ae salût dai citadins – e nô o zontin: ancje chê dai poleçs – garantide de Costituzion.

REGJON. Pierditis di aghe

Pierditis di aghe di fâ pôre. Secont un studi resint de Ccia, par ogni citadin di cheste regjon si pierdin 154 litris di aghe ogni di, par un cost stimât di 188 milions di euros par an. I teritoris di Gurize e di Triest a son chei che a stan malementri, cuntune pierdite che a rive al 50% de capacitât dai acuedots. Rêts vecjis e malandadis, scjarse manutenzion e atacs abusifs a son lis causis de pierdite di tante aghe. Ma dulà sono i vecjos acuedots romans di une volte, chei che a funzionin ancjemò?

LIGNAN. A son tornâts i moscjins

Si viôt che si cjatin ben, cussì a son tornâts ancje chest an i Chironomidis, che no son une ondate di turiscj dal Nord, ma une famee fastidiose di insets che a somein ai moscjins. A son tornâts a Marina Punto Faro di Lignan. Ju si jere za olmâts tai dîs passâts, ma cualchi zornade indaûr, une buinore, dut a bot, lis barcjis blancjis de darsene a son diventadis neris, come se un nûl biblic lis ves cувierzudis. Difilic parâju vie. Par fortune, chescj moscjins a vivin une sole zornade, ma in chê di... Cuissâ che no vedin volût domandâ un passaç par fâ gratis un zîr in lagune?




Miercus 22	S.te Marie Madalene	Domenie 26	XVII Domenie vie pal an
Joibe 23	S.te Brigjide de Svezie	Lunis 27	S. Aureli
Vinars 24	S.te Cristine di Bolsene	Martars 28	S.ts Cels e Nazari
Sabide 25	S.Jacum	Il timp	Il cjalt nol da recuie.

	Il soreli Ai 22 al jeve aes 5.37 e al va a mont aes 20.51.	Il proverbi Cul fâ si fale e a fuarce di falâ si impare. Lis voris de setemane Tal ort in câs di cjaldon taponait il teren cun sacs di tele par protezi lis semencis e lis plantutis metudis di pôc.
	La lune Ai 29 Lune plene.	

La spine dal prin di Avrîl

Tal tesaur dal Domo di Vençon, si ten di cont un relicuiari dal Cuatricent di arint dorât. Il ricet di veri al conten une spine, che la sô storie e sarès peade a chê dal pes di Avrîl. Se si spiticaîs di cirî cheste vôs su la Enciclopedie “Treccani”, o podès ancje lei che cualchidun al pretindarès di ripuartâ cheste storie a un miracul che al sarès sucedût a Aquilee ai tims dal patriarcje Bertrant. Ma si zonte che la vere storie dal pes dal prin di Avrîl e sarès stade scrite daûr di une donazion che il re Pipin al fasè al Pape, su di une bergamine fate cu la piel dal Agnus Dei. Se la “Treccani” e ripuarte la crodince di Aquilee, al è parcè che e esist, di fat, la liende dal miracul de spine che al sarès sucedût ai tims di Bertrant. E conte che il patriarcje, che i tignive a vè il Pape in Friûl, se no intune visite pastorâl, al mancual a un gustâ di chei che la cusine patriarcjâl e jere famose, al veve invidât il Pape a un gustâ la zornade di Pasche. Ma lui, in chê zornade, al veve un impegn impuartant: chel di batiâ la fie dal re di France, e figuraitse se al podeve mancjâ! Ma i stiçave ancje l’incuintri e il gustâ cul patriarcje; cussì i fasè savè che prime al varès fat vulintûr un scjampon in Friûl il prin di Avrîl, che al jere di Vinars Sant di Cuaresime. Ma il gustâ, in chê zornade, al veve di jessî di magri e no di cjar, come dal sigûr al varès preferit il patriarcje, che cundut de sô etât, i plaseve ancje il cicin. Cussì si fasè un grant tratament cu la consumazion di grandis cuantitâts di trutis dal Nadison, che a plaserin ancje al Pape; ma par disgracie la spine di un pesson che al veve a pene mangjât i restâ impirade tal cucl, riscjant di scjafoiâlû. Al sucedè un moment di spavent e di pôre, intant che i presints a continuavin a rumiâ, cu la massime atenzion, lis cjaris sauridis des trutis; in dal rest, cui podeval meti man a gjavâ la spine dal cucl papâl? Par fortune, vuelistu pal viaç che pe mangjative, il Pape si indurmidì. Tal indoman – ve culî il miracul – il Pape si sveà come se nol fos sucedût nuie; cheste e je une poesie che si cjate, cun altris,



Particolâr dal relicuiari di arint dorât

intune racuelte di manuscrits te biblioteche di Vençon. Ma al reste di stabili cemût che di chest miracul si è rivâts al pes dal prin di Avrîl



Il Domo di Vençon

intindût come scherç. Culî nus jude une interpretazion di un dai poetis di chê fraterne, che si firmavin dome cun anagrams o pseudonims: Rumtot, che al scrîf che di chel fat e je rivade la usance dal pes di Avrîl. Prime, preparâ un pes e jere une ofese; dopo al diventâ un scherç, parcè che, colant tal prin di Avrîl une vilie, si dave al gustâ di gras la forme.. di un pes. No metarès une man sul fûc su la interpretazion dal poete Rumtot – Gasparo Carabello, secul XVII, che al faseve part di une cubie di poetis matarans. In dal rest, nol risulte che un Pape al sedi rivât in Friûl ai tims di Bertrant. Almancul che no lu vebi fat in incognite.

Roberto Iacovissi

La acuire dal Friûl su lis mais dal Udin

La gnove stagjon de Udinese Calcio si vierç tal segn de identitât furlane. Graciis ae colaborazion cu la ARLeF-Agenzie regjonâl pe lenghe furlane, il gnûf training kit 2026/27, realizât de Macron, e à sul pet la acuire dal Friûl, simbul storic de comunitât furlane. Une sielte che e infuartis il leam fra il club e il teritori propit tal an che l'Udin al fâs fieste pai 130 agns de fondazion. Za tai prins alenaments de stagjon, a pene tacâts, i zuiadôrs blancs e neris a àn doprât il gnûf kit, caraterizât dai colôrs blu e zâl dal Friûl. La presince de acuire sul cûr e trasforme la maie di alenament intun simbul di apartignince e e valorize storie e identitât furlane, contribuint a promovile ancje fûr dai confins regjonâi.



Peraulis in dismentie

par cure di Mario Martinis

- > **INCALMÂ**
v. = innestare (voce veneta, da calmo ‘innesto’, a sua volta da calamus ‘canna, gambo’)
Incalme a coronute chel rosâr.
Innesta a coroncina quel rosaio.
- > **INCANSESEMÂ**
v. = incantare, sbalordire (dal nome incantesimo, formato da incanto e -ésimo, deverbale di incantare ‘fare incantesimi, affascinare, avvincere’, dal latino incantare)
Si è fermât a cjâlâ l’amont, dut incantesemât.
Si è fermato a guardare il tramonto, tutto incantato.
- > **INCEÂ**
v. = abbagliare, abbarbagliare (dal latino parlato incaecare, dal nome caecus ‘cieco’)
Il soreli di març nus incee.
Il sole di marzo ci abbaglia.
- > **INCOALÎT**
agg. = sbalordito, istupidito, imbertonire (participio passato del verbo incoali ‘sbalordire, istupidire’, da crocai, cro cro, il verso imitativo del gabbiano)
Chê fantate lu à dabon incoali.
Quella giovane lo ha davvero imbertonito.
- > **IN CURT**
a breve, tra poco (formato dalla preposizione in e dall’aggettivo curt ‘corto, breve’)
Si viodin in curt.
Ci vediamo a breve.
- > **INCUIN**
s.m. = incudine (dal latino tardo incūs, a sua volta da incūdere ‘battere il ferro’)
Dulâ âstu l’incuin? Al è daûr il soflet.
Dove è l’incudine? Si trova dietro il mantice.